

բոլոր կամենիցի Հայկազունք և այլ ազգեր: Մի-
քայել վարդապետ սրտաշարժ քարոզ մի խօսեցաւ
հաւատացելոց, որոյ աւարտման միջոց պարկեշտու-
թեամբ մօտեցան բեմին զոյգ մի, որոնք արդէն
իրենց առաքինութեամբ բազմութեան համակրու-
թիւնը գրաւած էին. Միքայել վարդապետ՝ աւե-
տարանին խօսքերով պսակեց և անլուծանելի կա-
պով կապեց զնոսա. համօրէն ժողովուրդք Հայք և
օտարք լիասիրտ մաղթեցին նոր պսակելոց՝ երջան-
կութիւն և բազդ և շատ երկայն արև: Փետայն մեզ
ծանօթ Ակոբսոյ հայ պատանին էր, որ կ'առնուր
Խոցիմիրաքիի միակ դուստրը Մարգարիտէ: Հարս-
նետունն եղաւ Հայոց դատարանն, զոր հապճեպով
պատրաստեցին, փոխանակ աթոռներու՝ երկայն
երկայն նստարանները կապերտներով և գորգերով
յարդարելով. շատ էին հարսնետորքն, ամենեցուն
երեսին վրայ գոհութեան զուարթութիւն. շատ
մաղթողական բաժակներ պարպուեցան յերջան-
կութիւն հայ պսակելոց. դողդոջուն ձայներով հայ
պառաններ, յորդորաբար հայերէն օրհնութիւններ
կը հեղուին պսակելոց գլխին. « Երկայն արև լինին,
ծլին ծաղկին. իրենց թոռներուն պսակները պաղ-
նեն »: Եւ յիրաւի, հասած է նոցա լիաբերան
օրհնութիւնն. զի Ակոբսոյ կամ Ակոբսովիչ ցեղը՝
բազմածնունդ և երկար անուանի եղած է Լեհա-
հայոց մէջ:

Պսակելոց արձանագրութեան մէջ, յետ զաղ-
թականաց դարձին, առաջին տեղ կը բռնէ Ակոբ-
սոյի պսակման արձանագրութիւնն: Խոցիմիրաքեայ
տնկած կակղիք՝ առիթ եղան ինձ ուշադրութիւն
դարձընելու այս դէպքիս, որոնք անբարբառ վկայք
երկու հարիւր տարի է որ կանգնած իրենց տեղը՝